

REGULAMENTO INTERNO DO DEPARTAMENTO DE FILOLOXÍA INGLESA

EXPOSICIÓN DE MOTIVOS

O presente regulamento vén dar cumprimento ao disposto no artigo 9.3 dos Estatutos da Universidade da Coruña, aprobados polo Decreto 101/2004, de 13 de maio (DOG de 26 de maio).

A regulación do réxime de funcionamento e organización do departamento de Filoloxía Inglesa fica enmarcada na normativa aplicable á Universidade da Coruña, en concreto na Lei Orgánica 6/2001, de 21 de decembro, de Universidades e no Decreto 101/2004 da Xunta de Galicia, que aproba os Estatutos da Universidade da Coruña, así como pola Lei 30/1992, de 26 de novembro, de réxime xurídico das administracións públicas e do procedemento administrativo común, modificada pola Lei 4/1999, naqueles aspectos que se recollen na presente normativa nos que son de obrigado cumprimento ou que con carácter subsidiario foren de aplicación.

TÍTULO PRELIMINAR. DO ÁMBITO E DO RÉXIME XURÍDICO DE APLICACIÓN

Artigo 1. Obxecto do regulamento

O presente regulamento establece e regula o funcionamento e organización do departamento de Filoloxía Inglesa.

Artigo 2. Ámbito de aplicación

O presente regulamento será de aplicación ao departamento de Filoloxía Inglesa da Universidade da Coruña, constituído pola área de coñecemento Filoloxía Inglesa e consecuentemente será de obrigado cumprimento para todos os seus compoñentes en canto membros del.

Artigo 3. Réxime xurídico

1. O departamento de Filoloxía Inglesa rexerase pola Lei Orgánica de Universidades, polas normas que emanen dos correspondentes órganos do Estado e da Comunidade Autónoma de Galicia no exercicio das súas respectivas competencias, polos Estatutos da Universidade da Coruña e as súas normas de desenvolvemento e finalmente polo presente Regulamento de réxime interno.
2. En defecto do establecido no presente regulamento aplicarase a Lei 30/1992, de 26 de novembro, de réxime xurídico das administracións públicas e do procedemento administrativo común.
3. Contra as resolucións e acordos dos órganos unipersoais ou colexiados do departamento, poderase formular recurso de alzada no prazo dun mes perante o reitor, tratándose de

resolucións do director, e perante o Consello de Goberno, tratándose de acordos do consello de departamento, cuxa decisión esgotará a vía administrativa e será impugnabile perante a xurisdición contencioso-administrativa de conformidade coa lei reguladora desta xurisdición.

TÍTULO I. NATUREZA E FUNCÍONS

Artigo 4. Natureza

Os departamentos son os órganos encargados de coordinar o ensino dunha ou varias áreas de coñecemento nun ou varios centros de acordo coa programación docente da Universidade.

Artigo 5. Funcións

Son funcións dos departamentos:

- a. Organizar e desenvolver, nos diferentes ciclos dos estudos universitarios, o ensino propio da área ou áreas de coñecemento da súa competencia.
- b. Apoiar as actividades e iniciativas investigadoras do persoal adscrito á área ou áreas de coñecemento da súa competencia.
- c. Organizar e desenvolver estudos de terceiro ciclo.
- d. Contratar con entidades públicas ou privadas ou con persoas físicas a realización de traballos de carácter científico, técnico ou artístico, así como o desenvolvemento de cursos de especialización.
- e. Participar na elaboración de planos de estudo, no procedemento de selección do persoal docente e investigador e nos procesos de avaliación da calidade institucional.
- f. Calquera outra que lles asignaren as disposicións legais vixentes e os Estatutos da Universidade da Coruña, aprobados polo Decreto 101/2004.

TÍTULO II. DA ORGANIZACIÓN DO DEPARTAMENTO

CAPÍTULO I. DA ESTRUTURA DO DEPARTAMENTO

Artigo 6. Persoal pertencente ao departamento de Filoloxía Inglesa

O departamento agrupa o persoal docente e investigador da Universidade, funcionario e contratado, o persoal de investigación, bolseiros/as de investigación, estudantes e o persoal de administración e servizos que estean adscritos a el.

Artigo 7. Adscrición do profesorado

A adscrición do profesorado a un departamento farase atendendo á convocatoria de cada praza.

Artigo 8. Grupos de investigación

O departamento fomentará a constitución de grupos e redes de investigación en que participen os/as seus/súas investigadores/as. As relacións entre o departamento e os grupos de investigación en que participen os seus membros acomodaranse á normativa que para este efecto dite o Consello de Goberno.

Artigo 9. Sede do Departamento

A sede do Departamento estará situada na Facultade de Filoloxía, no Campus da Zapateira. O Departamento está adscrito a dita Facultade.

CAPÍTULO II. DO GOBERNO DO DEPARTAMENTO

Artigo 10. Órganos de goberno do departamento

Para o goberno, representación e administración do departamento establécense os seguintes órganos:

- a. Colexiados:
 - Consello de Departamento
 - Comisión de Doutores
 - Comisións delegadas do Consello de Departamento:
 - Comisión Permanente
 - Comisión de Biblioteca
 - Comisión Económica
- b. Unipersoais:
 - Director/a de departamento
 - Secretario/a de departamento

SECCIÓN PRIMEIRA. DOS ÓRGANOS COLEXIADOS

Artigo 11. Concepto

O Consello de Departamento é o órgano colexiado de goberno do departamento.

Artigo 12. Composición do Consello de Departamento e outras cuestións

1. O Consello de Departamento comporase:
 - a. Do/a director/a, que o presidirá e convocará, e do/a secretario/a.
 - b. De todos/as os/as doutores/as, profesores/as e axudantes integrados/as no departamento. Enténdese por tales todo o profesorado funcionario dos corpos docentes universitarios e todas as categorías de persoal docente e investigador contratado tal e como se contén nos artigos 69.2 e 3 dos Estatutos da UDC.
 - c. Unha persoa representante dos investigadores con cargo a convocatorias oficiais e, se for o caso, dos/as lectores/as integrados/as no departamento. Enténdese que é investigador/a con cargo a convocatorias oficiais quen, após obter a suficiencia investigadora ou o diploma de estudos avanzados, realice tarefas de investigación

- no departamento con cargo a convocatorias públicas nacionais ou autonómicas publicadas nos diarios oficiais.
- d. Unha representación do estudantado do departamento, equivalente ao 25% do número total de membros do consello, dos cales dous terzos corresponderán a estudantes de primeiro e segundo ciclo matriculados en, polo menos, unha das materias impartidas polas áreas de coñecemento integradas no departamento, e o terzo restante corresponderá a estudantes de terceiro ciclo dos programas de doutoramento en que participe o departamento. Dentro da porcentaxe de estudantes de primeiro e segundo ciclo darase preferencia na proclamación como candidato/a electo/a a que haxa polo menos u/unha de cada centro en que o departamento imparte docencia. En caso de se non cubrir o terzo correspondente ao estudantado de terceiro ciclo esa porcentaxe será ocupada por estudantes de primeiro e segundo ciclo e viceversa.
 - e. Unha persoa representante do persoal de administración e servizos adscrito ao departamento. Deberán convocarse eleccións a representantes do persoal de administración e servizos no Consello de Departamento cando o número de integrantes deste sector for superior a un. En caso contrario, será membro do consello sen celebrar eleccións.
2. As persoas representantes no Consello de Departamento serán elixidas por un período de dous anos.
 3. A determinación do número de representantes que corresponde a cada sector será realizada pola Secretaría Xeral coa aprobación do censo definitivo, segundo as proporcións sinaladas neste artigo.
 4. En caso de cesamento de representantes, no prazo máximo dun mes o/a director/a do departamento cubrirá os postos coas persoas candidatas que no último proceso electoral realizado obtivesen o maior número de votos en cada sector sen acadaren representación. Se non as houber, os postos serán cubertos no seguinte proceso electoral, tras a expiración do mandato do Consello de Departamento, salvo que o número de novos postos para cubrir sexa superior á metade do número total de representantes de cada sector, en cuxo caso terán que se convocar eleccións parciais. O mandato dos representantes que así accedan ao Consello de Departamento non durará máis que o tempo de mandato que reste aos demais representantes.
 5. Nos supostos de incremento do número de doutores/as e a súa incorporación ao Consello de Departamento, así como a do resto dos membros cuxa porcentaxe dependa daqueles, deberase proceder segundo dispoña o regulamento electoral xeral.
 6. En caso de incumprimento inxustificado desta obriga por parte do/a director/a do departamento calquera persoa interesada poderá solicitar a intervención da Secretaría Xeral, que suplirá a actuación do/a director/a.

Artigo 13. Competencias do Consello de Departamento

Son competencias do Consello de Departamento:

- a. Elixir o/a director/a e, se for o caso, revogalo/a.

- b. Programar as actividades docentes e eventualmente investigadoras do departamento, elaborar o seu plano de organización docente e propor os programas de doutoramento.
- c. Formular as demandas do persoal docente e investigador.
- d. Organizar cursos ou estudos de posgraou ou especialización dentro do seu ámbito de competencia.
- e. Admitir ou rexeitar os proxectos de tese de doutoramento, dar a conformidade para a súa presentación, no seu caso, a proposta da Comisión de Doutores.
- f. Admitir ou rexeitar as propostas da Comisión de Doutores para o nomeamento dos tribunais que deberán xulgar as teses de doutoramento.
- g. Remitir á comisión de Doutoramento da Universidade un exemplar de cada tese de doutoramento unha vez que fora aprobada, para efectos de arquivo e documentación.
- h. Participar na selección e contratación do persoal docente e investigador.
- i. Propor nomeamentos de doutores/as honoris causa.
- j. Elaborar o regulamento de réxime interno do departamento.
- k. Calquera outra competencia que lle for asignada polas disposicións legais vixentes e polos Estatutos da UDC, aprobados polo Decreto 101/2004 da Xunta de Galicia.

Artigo 14. Funcionamento do Consello de Departamento

1. O Consello de Departamento reunirse en sesión ordinaria cantas veces sexa necesario e, polo menos, unha vez cada trimestre, e sempre que o/a director/a o convoque por propia iniciativa ou por solicitude do 25% dos seus membros, en cuxo caso a sesión se realizará nos quince días seguintes ao de recepción da solicitude.
2. A orde do día das sesións será fixada polo/a director/a tendo en conta, se for o caso, que calquera dos membros do Consello de Departamento poderá solicitar por escrito a inclusión dun punto na orde do día. En tal caso, ese punto incluírase na primeira sesión ordinaria que se convoque, sempre que se solicitase antes de ter enviada a convocatoria.
3. A convocatoria será efectuada polo/a secretario/a do departamento, por orde do/a director/a ou de quen legalmente o substitúa. Esta convocatoria incluírá a data, hora e lugar de realización da sesión, así como a orde do día. As citacións da convocatoria serán cursadas polo/a secretario/a, coa antelación suficiente para que todos os membros a reciban corenta e oito horas antes de que teña lugar a sesión, e debe incluír unha orde do día explícita. As citacións levaranse a cabo mediante notificación persoal por carta ao centro de traballo ou notificación en soporte informático. De convocarse a sesión fóra do período lectivo previsto no calendario escolar, a convocatoria cursada ao alumnado deberá, ademais, remitirse aos seus respectivos domicilios.
4. Cando a natureza dos asuntos que se foren tratar así o requira, a xuízo do/a director/a, poderanse convocar ás sesións do Pleno ou, se for o caso, ás dalgunha comisión ás persoas que se estime necesario, con voz mais sen voto.
5. As sesións extraordinarias do Consello de Departamento están sometidas aos mesmos requirimentos que as ordinarias, coa excepción de que a súa convocatoria pode facerse con só vinte e catro horas de antelación e para o tratamento de puntos de inaprazable consideración. Non se incluírán na orde do día os puntos relativos á aprobación de actas, informes ou suxestións e preguntas.

Artigo 15. Constitución

Para a válida constitución do Consello de Departamento, para os efectos de realización de sesións, deliberacións e toma de acordos, requirirase a presenza do/a director/a e do/a secretario/a ou, se for o caso, de quen os/as substitúa, e a da metade, polo menos, dos seus membros. De non acadarse este quórum, o Consello de Departamento poderá constituírse en segunda convocatoria coa presenza da terceira parte dos seus membros incluíndo a/o director/a e secretario/a, ou de quen os/as substitúa.

Artigo 16. Asistencia e desenvolvemento das sesións

1. A asistencia ás sesións dos órganos colexiados da Universidade é un dereito e un deber dos membros que os integran.
2. A condición de membro dun órgano colexiado é persoal e non delegable.
3. Toda ausencia poderá xustificarse por escrito con anterioridade á sesión en que se produza perante o/a secretario/a do departamento.
4. Ás sesións só poderán asistir os seus respectivos membros, agás no caso recollido no artigo 14.4.
5. Non poderá ser obxecto de deliberación ou acordo ningún asunto que non figure incluído na orde do día, agás que estean presentes todos os membros do órgano colexiado e sexa declarada a urxencia do asunto polo voto favorable da maioría.

Artigo 17. Votacións e adopción de acordos

1. As votacións poderán realizarse por asentimento por proposta do/a director/a do departamento, a man alzada, pública por chamamento ou secreta. O/a director/a do departamento decidirá a utilización dunha ou doutra modalidade. Porén, a votación secreta poderá ser empregada cando o acordo que se deba adoptar tiver carácter persoal ou o solicítase polo menos un membro do consello. Considéranse adoptados os acordos por asentimento cando as propostas sometidas ao Consello non suscitaren oposición de ningún membro deste e non requirise outra forma de votación ningún membro.
2. O Consello adoptará os seus acordos por maioría de votos afirmativos fronte aos negativos, sen ter en conta as abstencións, agás naqueles supostos en que se esixa legal ou regulamentariamente maioría absoluta ou cualificada.
3. En caso de empate nos resultados dunha votación decidirá o/a director/a co seu voto de calidade.
4. Non poderán someterse a votación aquelas cuestións que non estiveren especificadas en cada punto da orde do día e en relación directa con elas. Tampouco se poderán tomar acordos dentro dos apartados da orde do día correspondentes a “Informes” e “Suxestións e Preguntas”.
5. Iniciada unha votación, esta non poderá interromperse, e tampouco se aceptarán modificacións no cómputo total de votantes unha vez comenzada a votación.

Artigo 18. Actas

1. De cada sesión que teña lugar do Consello de Departamento redactará a acta o/a secretario/a, que especificará necesariamente a relación de asistentes e ausentes que achegasen xustificación, a orde do día da reunión, as circunstancias do lugar e tempo en que tivo lugar, os puntos principais das deliberacións, así como o contido dos acordos e a forma en que estes se adoptaron.
2. Na acta figurará, por solicitude dos respectivos membros do Consello de Departamento, o voto contrario ao acordo adoptado, a súa abstención e os motivos que a xustifiquen, ou o sentido do seu voto favorable. Así mesmo, calquera membro ten dereito a solicitar a transcripción íntegra da súa intervención ou proposta, sempre que achegue no acto ou no prazo que sinala o/a director/a, o texto que se corresponda fielmente coa súa intervención, facéndose así constar na acta ou uníndose copia a ela.
3. Os membros que discrepen do acordo maioritario poderán formular voto particular por escrito no prazo de corenta e oito horas, que se incorporará ao texto aprobado.
4. Cando os membros do órgano voten en contra ou se absteñan, quedarán exentos da responsabilidade que, se for o caso, puidese derivarse dos acordos.
5. As actas aprobaranse na mesma ou na seguinte sesión, podendo non obstante emitir o/a secretario/a certificación sobre os acordos específicos que se adoptasen, sen prexuízo da ulterior aprobación da acta.

Artigo 19. Comisión Permanente do Consello de Departamento

1. Poderase crear unha Comisión Permanente, con competencias delegadas do Consello de Departamento. Os acordos que adopte a Comisión Permanente relativos a competencias delegadas polo Consello de Departamento serán comunicados a éste na primeira sesión ordinaria que se realice.
2. A composición da Comisión Permanente será a seguinte:
 - director/a
 - secretario/a
 - tres profesores/as
 - un/ha investigador/a
 - tres estudantes (dous de 1º-2º ciclo e un de 3º ciclo)
 - un P.A.S.
3. As competencias da Comisión Permanente serán:
 - a) Aprobar asuntos de trámite.
 - b) Elaborar e informar de todos os asuntos que lle recomende o Consello de Departamento.
4. No seu funcionamento rexeráse polas mesmas normas recollidas no artigo 15, 16, 17 e 18 do presente regulamento.
5. Para a súa renovación seguiranse os mesmos criterios que establece o artigo 12 do presente regulamento, polo disposto para os Consellos de Departamento no Regulamento de réxime electoral ou, se for o caso, polos acordos da Xunta Electoral.

Artigo 20. Comisión de doutores

1. A Comisión de Doutores estará composta por todos/as os/as doutores/as do Departamento.
2. A Comisión estará presidida por o/a director/a do departamento e poderá designar un/ha secretario/a entre os seus membros.
3. A súa constitución rexerá polo expresado no artigo 15 deste Regulamento.
4. As súas competencias serán:
 - a. Elaborar os proxectos dos programas de Doutoramento, tanto do Departamento coma dos pluridepartamentais.
 - b. Propor a determinación do número de alumnos/as de Terceiro Ciclo e dos criterios de admisión.
 - c. Propor os/as titores/as de alumnos/as ou aceptar a elección de titor/a que fixese cada alumno/a que fose admitido/a.
 - d. Propor ou, no seu caso, aceptar os proxectos de tese de doutoramento, dar a conformidade para a súa presentación.
 - e. Formular as propostas para o nomeamento dos tribunais que deberán xulgar as teses de doutoramento.
 - f. Propor a admisión de estudantes doutras universidades para realizar o Terceiro Ciclo dentro do Departamento de Filoloxía Inglesa e informar sobre a validación de créditos ou cursos de doutoramento realizados.

Artigo 21. Comisións do departamento

1. O Consello de Departamento, para os efectos do seu mellor funcionamento ou actuación, poderá constituír comisións con carácter de apoio ou asesoramento e que non terán capacidade decisoria, debendo remitir todas as propostas que se adopten e os informes que se elaboren ao Consello de Departamento, que decidirá en última instancia.
2. A composición das comisións estará rexida polo recollido no artigo 19 deste Regulamento. A súa renovación levarase a cabo segundo os criterios que estableza o Consello de Departamento, tanto en canto á composición, como na periodicidade da súa renovación.
3. As funcións que correspondan a cada comisión serán asignadas polo Consello de Departamento.
4. Para o seu funcionamento e adopción de acordos, rexeranse polas normas establecidas para o Consello de Departamento no presente regulamento.

SECCIÓN SEGUNDA. DOS ÓRGANOS UNIPERSOAIS

Artigo 22. Do/a director/a do departamento

1. Os/as directores/as de departamento teñen a representación deste e exercen as funcións de dirección e xestión ordinaria destes.
2. Os/as directores/as de departamento son nomeados/as polo reitor logo de elección polo Consello de Departamento entre o profesorado doutor pertencente aos corpos docentes universitarios membro deste ou, no seu defecto, funcionario dos corpos docentes

- universitarios non doutores/as ou profesores/as contratados/as nos supostos previstos na lei. Neste caso poderá ser de aplicación o previsto no artigo 41.2 dos Estatutos da UDC.
3. De non se poder efectuar o nomeamento do/a director/a do departamento por falta de candidatos/as que reúnan os requirimentos esixidos, unha vez oído o Consello de Departamento o reitor encargaralle provisionalmente as funcións de dirección a un/unha dos/as profesores/as do departamento.
 4. A duración do mandato será de catro anos, e poderán ser reelixidos/as.
 5. Os/as directores/as de departamento cesarán nas súas funcións ao final do seu mandato, por pedimento propio, por causa legal sobrevida ou como consecuencia dunha moción de censura aprobada nos termos que regulamentarmente se establezan.
 6. En caso de dimisión ou ausencia do/a Director/a, proporase como director/a accidental ao/á profesor/a de categoría superior de máis antigüidade.
 7. A elección do/a director/a de departamento rexerese por un regulamento elaborado e aprobado polo Consello de Goberno.

Artigo 23. Funcións do/a director/a do departamento

Correspóndelle ao/á director/a de departamento:

- a. Exercer a representación do departamento.
- b. Presidir e convocar o Consello de Departamento e executar os seus acordos.
- c. Dirixir, coordinar e supervisar as actividades do departamento.
- d. Organizar as funcións de persoal de administración e servizos adscrito ao departamento e controlar o seu cumprimento.
- e. Promover contratos, de acordo co previsto na lei e nos estatutos.
- f. Executar as previsións orzamentarias e informar delas ao Consello.
- g. Propor ao reitor o nomeamento dunha persoa, de entre o profesorado e axudantes do departamento, como secretario/a do departamento.
- h. Formar parte da Comisión de Selección do Persoal Docente e Investigador Contratado, no caso de que a praza se adscriba ao seu departamento.
- i. Calquera outra que lle atribúan as disposicións legais vixentes e os estatutos da UDC, aprobados polo Decreto 101/2004, de 13 de maio.
- j. Elaborar a memoria anual.
- k. Negociar con entidades públicas ou privadas, de acordo co Consello do Departamento, os traballos ou cursos mencionados no artigo 83 da LOU, sempre que isto afecte ao conxunto do Departamento.

Artigo 24. Secretario/a de departamento

1. O/a secretario/a do departamento será nomeado/a polo reitor, por proposta do/a director/a do departamento de entre o profesorado e axudantes do departamento.
2. O/a secretario/a redactará as actas das sesións, custodiará a documentación e expedirá certificacións.
3. Exercerá, así mesmo, calquera outra función que lle delegue o/a director/a de departamento ou que lle encomenden as disposicións legais vixentes e os Estatutos da Universidade da Coruña.

4. Os/as secretarios/as de departamento cesarán por pedimento propio, por causa legal sobrevinda ou por decisión do reitor, por proposta do/a director/a do departamento.
5. En caso de ausencia, vacante ou enfermidade, o/a secretario/a será substituído/a polo membro do consello que decida o/a director/a, que reúna na súa persoa a condición de profesor/a ou axudante.

TÍTULO III. DA ACTIVIDADE DOCENTE

Artigo 25. Principios xerais

1. O departamento promoverá como un dos seus obxectivos fundamentais impartir unha docencia de calidade dirixida á formación integral e crítica do estudantado e á preparación para o exercicio de actividades profesionais.
2. A docencia é un dereito e un deber do persoal docente e investigador do departamento e será impartida baixo os principios de liberdade e responsabilidade, de acordo coa programación docente e os fins xerais da Universidade da Coruña.
3. O departamento é o responsable da docencia de acordo cos planos de estudos das distintas titulacións en que imparta o seu ensino e o plano de ordenación docente aprobado polo Consello de Goberno.
4. O departamento está obrigado a garantir o ensino adscrito á área ou áreas de coñecemento que o integran. En caso necesario, o Consello de Departamento arbitrará as medidas oportunas que garantan a docencia ante situacións de urxencia.

Artigo 26. Organización docente

1. O Consello de Departamento, con carácter anual e antelación suficiente respecto ao comezo do seguinte curso académico, deberá polo menos:
 - a) Aprobar o programa das materias ao seu cargo e o réxime de titorías do profesorado.
 - b) Determinar as actividades esixidas polos planos de estudo.
 - c) Aprobar o sistema ou sistemas básicos e xerais de avaliación do alumnado para cada materia, de acordo co que se estableza para tal fin na normativa da Universidade da Coruña.
 - d) Distribuír e asignar as tarefas docentes entre o profesorado, de xeito equitativo, de acordo coa súa categoría e coas necesidades docentes dos Centros.
 - e) Resolver calquera outra cuestión establecida na normativa elaborada polo Consello de Goberno.
2. As obrigas docentes do profesorado computarán anualmente.
3. O Consello de Departamento planificará as actividades docentes do profesorado visitante, emérito e honorario, que poderán estar dirixidas principalmente á docencia en seminarios, cursos monográficos ou de especialización.

Artigo 27. Seminarios, cursos ou congresos con cargo ao orzamento do Departamento

O Departamento de Filoloxía Inglesa poderá organizar seminarios, conferencias, cursos ou congresos durante o curso académico. Correspóndelle ao Consello do Departamento aprobar esta programación e o seu orzamento. Así mesmo, correspóndelle aprobar a dispensación de cursos, congresos ou calquera actividade na que figure o nome do Departamento sexa cal fose o seu financiamento.

Artigo 28. Seminarios, cursos ou congresos sen cargo ao orzamento do Departamento

Os/As profesores/as que dispensen cursos ou organicen congresos, conferencias ou seminarios sen cargo aos créditos do Departamento, poderán solicitar ao Consello a súa inclusión na memoria anual do Departamento.

Artigo 29. Reclamacións

1. O consello do Departamento atenderá as reclamacións de tipo académico. Tanto a reclamación como o acordo do Consello deberán ser razoados e deberán seguir a normativa de exames da universidade.
2. A tal fin, o Consello poderá nomear unha comisión transitoria composta por tres profesores/as que impartan a materia obxecto da reclamación ou algunha afín e un/ha alumno/a excluindo a os/as interesados/as.
3. No caso de corresponder a reclamación ao Terceiro Ciclo, os/as tres profesores/as deberán ser doutores e o alumno do terceiro ciclo.
4. A Comisión poderá solicitar información complementaria de calquera das partes implicadas.

TÍTULO IV. DA ACTIVIDADE INVESTIGADORA

Artigo 30. Principios xerais

1. O departamento asume como un dos seus obxectivos esenciais a investigación, fundamento da docencia, medio para o progreso da comunidade e soporte da transferencia social do coñecemento. E para tal efecto promoverá no marco das súas competencias o desenvolvemento da investigación así como a formación dos/as seus/súas investigadores/as.
2. A investigación é un dereito e un deber do persoal docente e investigador. Recoñécese e garántese, no ámbito do departamento, a liberdade de investigación individual e colectiva.
3. O departamento garantizará que todos os fondos bibliográficos e infraestruturas para a investigación estean a disposición de todo o persoal docente e investigador do departamento.
4. Os departamentos apoiarán programas de investigación onde se recollerán as liñas de investigación, os proxectos e mais os recursos de persoal e material necesarios.

Artigo 31. Contratos

1. O Departamento, ou o seu profesorado a través del, poderá contratar con entidades públicas ou privadas ou con persoas físicas, a realización de traballos de carácter científico, técnico ou artístico así como o desenvolvemento de cursos de especialización, formación ou perfeccionamento.
2. Ditos contratos serán establecidos segundo o aprobado polo Consello de Goberno da Universidade da Coruña.

TÍTULO V. DO PERSOAL DOCENTE E INVESTIGADOR

Artigo 32. Principios xerais

1. O Consello de Departamento poderá facer propostas en relación cos cadros de persoal docente e investigador.
2. Para iso deberá ter en conta os distintos centros nos que teña asignada a docencia, a fin de conseguir un reparto equitativo da docencia entre os/as profesores/as.

Artigo 33. Bolseiros/as

1. As propostas de nomeamento de bolseiros/as e mais as de contratación de persoal serán presentados ao Consello para a súa aprobación e, no seu caso, para a súa tramitación.
2. As propostas de nomeamento de bolseiros/as e mais as de contratación de persoal con cargo a fondos dun proxecto de investigación serán postas en coñecemento do Consello polo/a investigador/a responsable de dito proxecto. O Consello, logo de emitir o informe oportuno, tramitaraas ao Rectorado.

Artigo 34. Outros/as investigadores/as

A admisión de persoas que utilizan as instalacións e material do Departamento será previamente posta en coñecemento do Consello polos/as profesores/as responsables da mesma.

TÍTULO VI. DO RÉXIME ECONÓMICO E FINANCEIRO

Artigo 35. Recursos económicos

1. Para a realización das actividades docentes e investigadoras o departamento de Filoloxía Inglesa dispón:
 - a) Dos bens, equipos e instalacións que, previamente inventariados, a Universidade da Coruña lle destine.
 - b) Dos recursos que nos orzamentos da Universidade da Coruña se lle asignen.
 - c) Calquera outro recurso que puidese serlle atribuído.

2. Corresponde aos órganos de goberno do departamento velar polo mantemento e renovación dos recursos adscritos a este. Da súa conservación directa son responsables todos os membros adscritos a el, e será supervisada pola dirección do departamento.

Artigo 36. Competencias en materia económica

3. O Consello de Departamento adoptará anualmente os criterios para a asignación dos recursos do departamento que serán destinados ao funcionamento deste e á atención das tarefas docentes e investigadoras das áreas de coñecemento que o integran.
4. Corresponde á dirección do departamento:
 - a) Elaborar e presentar anualmente ao Consello de Departamento, para o seu debate e, se for o caso, aprobación, unha estimación por escrito dos ingresos e gastos do departamento no seu conxunto co reparto máis pormenorizado posible dos capítulos e unidades de gasto previstos para o exercicio económico seguinte.
 - b) Elaborar e presentar anualmente ao consello, para o seu debate e, se for o caso, aprobación, unha conta xeral por escrito dos ingresos e gastos do departamento no seu conxunto, distinguindo capítulos, conceptos e, no que sexa posible, unidades de gasto unha vez rematado cada exercicio económico.

TÍTULO VII. DA REFORMA DO REGULAMENTO

Artigo 37. Iniciativa de reforma do regulamento

Poderán propor a reforma do presente regulamento un terzo dos membros do Consello de Departamento. A proposta de modificación presentárase mediante escrito motivado dirixido ao/á director/a.

Artigo 38. Tramitación de reforma do regulamento

O texto da proposta de reforma será enviado polo/a director/a aos membros do Consello, que disporán de quince días para presentaren emendas. Transcorrido este prazo convocarase sesión ordinaria do Consello para aprobar ou rexeitar a reforma proposta. Á convocatoria xuntaranse as emendas presentadas, que serán sometidas a debate e votación.

Artigo 39. Aprobación da proposta de modificación do regulamento

Para a modificación do regulamento requírirase a súa aprobación por maioría absoluta do total dos membros do Consello e a súa posterior aprobación polo Consello de Goberno da Universidade.

DISPOSICIÓN TRANSITORIAS

ÚNICA. Período de adaptación da Comisión Permanente e comisións de traballo

A Comisión Permanente, así como o resto de comisións existentes no departamento á entrada en vigor do presente regulamento extinguíranse no prazo máximo dun mes,

debendo conformarse e constituírse a nova Comisión Permanente e demais comisións de conformidade co disposto neste regulamento en dito prazo.

DISPOSICIÓN FINAIS

PRIMEIRA. Derrogatoria

Queda derrogado o anterior regulamento interno do departamento.

SEGUNDA. Entrada en vigor

O presente regulamento entrará en vigor o mesmo día en que o aprobe o Consello de Goberno.